

ՄԵԼՔՈՆՅԱՆ Ա. Ա., Ջավախքը XIX դարում և XX դարի առաջին քառորդին (պատմաքննական ուսումնասիրություն), Ե., 2003, «Ջանգակ-97» հրատ., 500 էջ:

Աշոտ Աղասու Մելքոնյանի «Ջավախքը XIX դարում և XX դարի առաջին քառորդին (պատմաքննական ուսումնասիրություն)» աշխատությունը, որի դրույթների մեծագույն մասը հիմք են կազմել հեղինակի՝ վերջերս հաջողությամբ պաշտպանած դոկտորական ատենախոսության, բաղկացած է ներածությունից, 4 գլխից, վերջաբանից և հավելվածից: Այն եզրափակում է օգտագործված աղբյուրների ու գրականության ցանկը: Ներածության մեջ հետազոտողը խնդիր է դնում լուսաբանել Ջավախքի և հարևան Ախալցխայի, Ծալկայի շրջանների XIX դարի և XX դարի առաջին քառորդի պատմությունը: Այդ գիտական հիմնահարցը խորհրդային ժամանակաշրջանի պատմաբանների համար հանդիսանում էր «տերրա ինկոգնիտ», երբ կուսակցական վարագույրները ստիպում էին քողարկել սուր անկյունները կամ շրջանցել կարևոր ու սկզբունքային հարցերը: Առավել ևս, որ Ջավախքի պատմությունը շոշափում է հայ և վրաց ժողովուրդների, Հայաստանի ու Վրաստանի հանրապետությունների շահերը:

Ներածության մեջ աղբյուրների ու գրականության տեսությունը կառուցված է ժամանակագրական կարգով. XVI - XVIII դդ., XIX դ. սկիզբ, XIX դ. երկրորդ կես, 1918-1920թթ., խորհրդային ժամանակաշրջան, վերջին տարիներ: Ընդարձակ տարբերակով այդ ամենը ներկայացնում է հետևյալ պատկերը. XVI - XVIII դդ. Հյուսիսային Հայաստանի պատմությունը տրվում է թուրքական, XIX դարի սկիզբը՝ ռուսական աղբյուրների, XIX դարի երկրորդ կեսը՝ ցարական պաշտոնական տեղեկագրերի, «Կովկասյան օրացույցի» և Ե. Լալայանի, 1918-1920թթ. հայ-վրացական հարաբերությունները՝ Ս. Վրացյանի, Ա. Ջամալյանի, Պ. Աբելյանի, Ռ. Տեր-Մինասյանի ու այլոց աշխատությունների և մամուլի նյութերի հիման վրա: Վերջում տրվում են արխիվային ֆոնդերի տեսությունը և մամուլի նյութերը:

Գրականության ներկայացման հիմքում դրվել է տիպային մոտեցումը: Ընդ որում, հարկ է նշել, որ հեղինակը կատարել է որակապես բարձր, քննական մակարդակի աշխատանք՝ առաջ քաշելով տարբեր մոտեցումներ ու տեսակետներ: Ընդգծենք, որ վրաց պատմաբանների աշխատությունների այդօրինակ քննության մենք չենք հանդիպել: Դրանց քննությունը կրում է կոնկրետ, ճանաչողական և գիտական բնույթ:

Աշխատության առաջին գլուխը՝ «Ջավախքը հին և միջին դարերում», հիմնավորապես ներկայացնում է Ջավախքի ու պատմական Հայաստանի մյուս շրջանների՝ հարևան Ախալցխայի, Ասպինձայի և Ծալկայի՝ որպես հայկական նկարագիր ունեցող շրջանների պատմական անցյալը:

Երկրորդ գլխի՝ «Ջավախքը XIX դ. առաջին երեսնամյակին», առաջին ենթագլխում հեղինակը ներկայացնում է Էրզրումի սերասկերին ենթակա

Ախալցխայի փաշայության 24 գավառների վարչական բաժանումը XIX դ. սկզբին: Շեշտը դրվել է նահանգի վարչաէթնիկ պատկերի բացահայտման վրա: Սանջակների կառավարումն իրականացնում էին իրենց ենթակայության տակ 20-ից 60 գյուղ ունեցող սանջակբեյերը: Տվյալների բացակայության պատճառով Ախալցխայի փաշայության բնակչության մասին բերվում են 1828-1829թթ. պատերազմին նախորդող տարիների տվյալներ, այն է՝ 34,2 հազ. ընտանիք կամ էլ 272 հազ. մարդ՝ միջինը հաշվելով 8 մարդ: Մեծամասնությունը մահմեդականներ էին, որոնց մեջ զգալի էին նախկին քրիստոնյա վրացիներն ու հայերը:

Երկրորդ ենթագլխում Ախալցխայի փաշայությունը քննվում է XIX դ. սկզբի ռուսական ռազմաքաղաքական ոլորտում: Հեղինակը գտնում է, որ միայն XVIII դ. վերջին Ռուսաստանն Անդրկովկասը միացնելու ուղղությամբ ձեռք է առնում առաջին լուրջ ռազմադիվանագիտական ջանքերը, որոնց գործնական քայլը դառնում է XIX դ. սկզբին Արևելյան Վրաստանի միացումը:

Հանգամանորեն ներկայացվում է ռուսական պաշտոնյաների գործունեությունը երկրամասում՝ Ռուսաստանի տիրապետությունն ամրապնդելու համար: Ա. Մելքոնյանն իրավացիորեն նկատում է, որ 1803թ. Ռուսաստանի դեմ հանդես է եկել անդրկովկասյան տիրակալների՝ Երևանի խանի, Ախալցխայի ու Կարսի փաշաների կոալիցիան:

Երրորդ ենթագլուխը շոշափում է Ախալցխայի էյալեթի XIX դ. առաջին քառորդի ժողովրդագրական տեղաշարժերը:

Երրորդ գլուխը վերնագրված է՝ «Ախալքալաքի գավառը Ռուսական կայսրության կազմում (1828-1917թթ.)»: Առաջին ենթագլուխը վերաբերում է 1828-1829թթ.: Այստեղ ներկայացված են ռազմական գործողությունները, և ճշգրտվում է արևմտահայ գաղթականների թվաքանակը: Զավախքի միացման խնդրի քննության ժամանակ կարևոր է հաշվի առնել հետևյալ հանգամանքը: Ռուսական ցար Նիկոլայ I-ի 1828թ. հունվարի 28-ի որոշմամբ Օսմանյան Թուրքիայի դեմ պատերազմում խնդիր դրվեց գրավել Ախալքալաքը, Ախալցխան և Փոթին: Կար նաև հայկական մի նախագիծ: Խ. Լազարևը խնդիր էր դնում միացնել Արևմտյան Հայաստանը Ռուսաստանին՝ Ախալցխայի, Կարսի փաշայությունները մինչև Վանա լիճ, ինչպես և Էրզրում ու Տրապիզոն՝ Մեծ և Փոքր Հայքի նախկին տարածքների առանձին հատվածները: Այդ նախագծով նախատեսվում էր, իր աշխարհագրական դիրքի պատճառով, Ախալցխայի փաշայությունը միացնել Վրաստանին կամ Մոմխեթին (Վրացական Հայաստանին): Վերջապես, պատերազմի վերջում Դ. Պասկևիչը ենթադրում էր Թուրքիայի հետ ապագա սահմանների երեք տարբերակ. առաջին երկու տարբերակները նախատեսում էին ամբողջ փաշայության, իսկ երրորդը՝ մասնակի միացում: Գերակայեց ցարի կամքը:

Երկրորդ ենթագլուխը ներկայացնում է վարչաժողովրդագրական իրավիճակը 1830-1860-ական թվականներին: Բավական հանգամանորեն ներկայացվում են արևմտահայերի գաղթից հետո ժողովրդագրական փոփոխությունները: Հարկ է հիշատակել, որ Անդրկովկասի Գլխավոր վարչության խորհուրդը 1846թ. հուլիսի 22-ի հրամանագրով որոշել էր Ախալցխայի գավառի Ախալքալաքի տեղամասը, որպես

գերազանցապես հայերով բնակեցված տարածք, միացնել Ալեքսանդրապոլի գավառին: 1846թ. դեկտեմբերի 14-ի կանոնադրությամբ Անդրկովկասում ստեղծվեցին 4 նահանգներ՝ Թիֆլիսի, Քութայիսի, Շամախու և Դերբենդի: Թիֆլիսի նահանգի մեջ մտցվեց Ալեքսանդրապոլի գավառը՝ Ախալքալաքի տեղամասի հետ: 1848թ. Երևանի նահանգի ստեղծման նախապատրաստական աշխատանքների ժամանակ որոշվեց Ախալքալաքի տեղամասն անջատել Ալեքսանդրապոլի գավառից և միացնել Ախալցխայի գավառին: Ուշադրության արժանի են հեղինակի կազմած գյուղացուցակները՝ 1838-1850թթ. և 1856-1878թթ. բնակչության թվաքանակով, ինչպես նաև Ախալցխայի հոգևոր կառավարությանը ենթակա եկեղեցիների անվանացանկերը:

Երրորդ ենթագլուխը վերաբերում է Ախալքալաքի գավառի կյանքին XIX դ. վերջին և XX դ. սկզբին: Գավառի բնակչության ազգային կազմի վերաբերյալ բերվում են տվյալներ՝ XIX դ. վերջից մինչև 1914թ.: 1886թ. հայերը բնակչության 72,7 %-ն էին, վրացիները՝ 5,8 %-ը, ապա համապատասխանաբար՝ 1894թ.՝ 75,6 % և 5,6 %, 1897թ.՝ 72 % և 9,3 %, իսկ 1914թ.՝ 82,5 % և 7 %:

Գլուխ չորրորդ՝ «Զավախքը 1917-1923թթ.»։ Այստեղ տրված են Ժամանակավոր կառավարության ձեռնարկումները Անդրկովկասն ըստ երեք ազգությունների տեղաբաշխման սկզբունքի վերաբաժանելու ուղղությամբ, երբ հայկական կողմը հանդես եկավ հայկական երեք նահանգների (Երևանի, Ալեքսանդրապոլի և Ելիզավետպոլի) ստեղծման առաջարկությամբ: Ընդ որում, Ախալքալաքի գավառը հարևան հայաբնակ մյուս շրջանների հետ պետք է միացվեր Ալեքսանդրապոլի նահանգին: Շարադրված է 1918թ. թուրքական ներխուժման ժամանակ ախալքալաքցիների ինքնապաշտպանության և գավառը Հայաստանին միացնելու ուղղությամբ մղած պայքարի պատմությունը: Հատուկ ուշադրություն է հատկացված հայ-վրացական սահմանային վեճերի հիմնահարցին: Ուշագրավ են ՌԿ(Բ)Կ Կոմբյուրոյի կազմած հատուկ հանձնաժողովի նիստերում Ղարաբաղի, Զավախք-Ախալքալաքի, Խրամի և Լոռու հարցերի քննարկման մասին հեղինակի վկայակոչած նյութերը: Զավախքի վերաբերյալ գիտական նյութերի շրջանառություն մտցնելը վկայում է Հայկական հարցի լուծման վերաբերյալ Խորհրդային իշխանության քաղաքականության նկատմամբ հեղինակի լայնախոհ մոտեցման կարողությունը:

Ընդհանուր առմամբ, Ա.Մելքոնյանը կատարել է հսկայական ծավալի աշխատանք՝ Զավախքի XIX դ. և XX դ. առաջին քառորդի պատմության զանազան աղբյուրների ընտրության, համակարգման ու քննության ուղղությամբ: Գրախոսվող աշխատությունը տքնաջան ու երկարատև աշխատանքի արգասիք է և միանգամայն նոր խոսք հայոց պատմության տակավին չուսումնասիրված հիմնահարցերից մեկի հետազոտման խնդրում:

ԹՈՒՆՑՍՆ Վ. Գ.

Պատմական գիտությունների դոկտոր